


TEZAU LITURGIC

4 OCTOMBRIE

**SLUJBA
SF. CUVIOS-
MĂRTURISITOR
VARSANUFIE
IURCENKO
DE LA CHERSON**



MOSCOVA, 2000



Служба преподобному отцу нашему Варсонофию Херсонскому

НА ВЕЛИЦЕЙ ВЕЧЕРНЕ

Стихиры на Господи возвах, глас 4:

Егда Божественное звание, прииде на тя, /
богомудре отче Варсонофие, / тогда вся мирская
мудрования оставив, / Вышних взыскуя, /
невозвратно Христу последовал еси, / крест
священничества на рамо взем, / вкупе со иными
священномучениками, / яко верный пастырь
стада Христова, / в служении и окормлении
паствы ревностно подвизался еси. / Темже ныне
достойно со святыми наставники твоими /
Троицу воспеваеши присно, / Юже моли
даровати спасение верою чтущим тя.

Егда Божественное рачение найде на тя, /
блаженне отче Варсонофие, / тогда Святым
Духом движимь, / Христа пред отступники
исповедал еси, / заточение, изгнание и болезни
многия претерпел еси, / бодрость духа и
сострадание к ближним во всяких обстояниях
сохраняя, / к полку новомучеников и
исповедников волею сопричеслился еси, / с

нимиже ныне вкупе пред Лицем Божиим
предстоиши во славе / и молиши даровати
Православныя веры утверждение / и душам
нашим спасение.

Егда Божественное желание достиже тя, /
преславне отче Варсонофие, / тогда вся мирская
оставив, / неведущим Бога проповедал еси, / от
тьмы тех к свету богоразумия наставляя, /
клевету и инья козни вражеския поправше, /
молитвами и поучении храмы душевныя
неустанно созидаше. / Темже и венцем небесным
/ Христос, Емуже неленостно поработал еси,
венча тя; / Егоже моли спасти и просветити
души наша.

Слава, глас 6:

Днесь созывает нас преподобнаго отца и
исповедника торжество, / приидите убо,
празднолюбцы, / светло празднуем память его,
глаголюще: / радуйся, светильниче
многосветлый, / возводя ко Христу множества
просвещенных тобою; / радуйся, града Херсона
и всея земли наша похвало и удобрение, / и
всех верных благоутишное пристанище и
крепосте; / радуйся за Христа претерпети узы и
раны сподобивыйся, / с Нимже ныне присно
пребываеши в радости, / Егоже моли, отче
благомудре Варсонофие, / избавити ны от

видимых и невидимых враг / и спасти души наша.

И ныне, глас 6:

Кто Тебе не ублажит, Пресвятая Дево, / кто ли не воспоет Твоего пречистаго Рождества? / Безлетно бо от Отца возсиявый Сын Единородный, / Той же от Тебе, Чистая, пройде, / неизреченно воплощься: / естеством Бог Сый, / и естеством быв Человек нас ради; / не во двою лицу разделяемый, / но во двою естеству / неслитно познаваемый. / Того моли, Чистая Всеблаженная, / помиловатися душам нашим.

Стихиры на литии: Глас 1:

Силе благодати от уст твоих исходящей, / вси внимающи словесем твоим дивляхуся, / и тобою проповедуемому Христу от души вероваша, / Егоже моли, премудре отче Варсонофие, / спаситися всем нам, священное твое торжество совершающим.

Божие величие богодухновенно воспев, / к познанию во Святей Троице Единого Бога многих богоотступных сынов привел еси, / потрудилися над преображением своєю души понуждая: / аще вся силы направити ко очищению сердца потщитесь, - рече, / - чада

Божия возлюбленнии наречетесь./ Темже и мы,
духовныя чада твоя/ яко наставника
благочестия, любовию воспевающе,/ со
умилением молим тя:/ научи ны выну пред
лицем Божиим ходити.

Слава, глас 6:

Наста, исповедниче Варсонофие,/ всечестное и
преславное торжество / в прославлении твоём
со всеми святыми Русские земли./ И ныне вкупе
с ними молися ко Господу,/ спастися душам
нашим.

И ныне, глас тойже:

Предвозвещует Гедеон зачатие,/ и сказует
Давид рождество Твое, Богородице:/ сниде бо,
яко дождь на руно,/ Слово во чрево Твое,/ и
прозябла еси безсеменне,/ Земле святая,/ мира
спасение Христа Бога нашего, Благодатная.

Стихиры на стиховне, глас 8:

Даждь ми светозарную благодать,/ от
Божественнаго свыше промышления,/ избежати
страстей омрачения/ и пети усердно твоего,
преподобне отче и исповедниче,/ жития
красная исправления.

Стих: Честна пред Господем/ смерть
преподобных Его.

Апостольских деяний ревнителю,/ землю
Херсонскую яко жребий приемши,/ святым
крещением людие многия/ из тьмы и бездны
безбожия/ к свету спасительному извел еси.

Стих: Блажен муж, бояйся Господа,/ в заповедех
Его восхощет зело.
Послушания усердный подвижник,/ выю свою
подкониw окормлению наставников своих,/
духовне тя породивших,/ и восприят в помощь
на супротивника глубочайшее смирение,/ имже
разруши козни вражия:/ ничтоже бо может враг
на смиренныя.

Слава, глас 4:

Взыскующих Христа окормитель и кормчий,/
столп Православия и веры поборник,/ ты,
старче богомудре Варсонофие,/ апостольски
взывал еси:/ ничтоже ны разлучит от любви
Божия;/ худшее, братие, покорим лучшему/ и
плоть поработим духу./ Темже явился светильник
Церкви,/ не под спудом, но на свещнице
поставлен,/ да прославят Бога вси видящии
дела твоя.

И ныне, глас тойже:

Ни слово, ни разум,/ ни всякая мудрость
человеческая/ Твое не возмогут рождество
разумети/ и воспети достойно,/ но страхом

приклоншеся / ужасаемся величию Твоему,
Непорочная.

Тропарь, глас 8:

Православия ревнителю, / ересей и расколов
богомудрый обличителю, / Церкви Святыя
изящное украшение, / притекающим к тебе
верный предстателю и заступниче, / преподобне
отче наш, Варсонофие, / молися ко Господу
Спасу нашему / землю Херсонскую и всю страну
нашу от всяких бед и зол избавити, / умирить
мир и спасти души наша.

Ин тропарь, глас 2:

В молитвах теплый заступниче / и просящим
скорый послушателю, / отче исповедниче
Варсонофие, / приими моление наше, / и Христа
Бога моли помиловати нас, / тя во святых
прославляющих.

НА УТРЕНИ

По 1 стихословии седален:

В духе Евангельских заповедей воспитав свою
душу, явился еси делателем неленостным на
ниве Христовой, избранниче Божий, преподобне
отче Варсонофие, все упование на Единого Бога
возложив, благодатию тебе данною преуспел еси
во учении и доброделании.

Слава и ныне, Богородичен:

Обновила еси, Чистая, божественным рождеством Твоим истлевшее страстьми земнородных мертвенное естество: и воздвигла еси вся от смерти к жизни нетления. Темже Тя по долгу блажим вси, Дево Препрославленная, якоже прорекла еси.

По 2 стихословии седален:

Мужественное показал еси души твоея мудрование, человеческое разумение оставль, Высшей Премудрости ум, волю и чувство покорил еси; темже вшедше в Небесная, просвети, отче, благодарным сердцем тя восхваляющия.

Слава и ныне, Богородичен:

Ужасно чудо зачатия, и несказанен образ рождества в Тебе познася Приснодево Чистая, ужасает мой ум, и удивляет помышления; слава Твоя, Богородице, во всех простресея, ко спасению душ наших.

По полиелеи седален:

Евангельское учение о Царствии Божии, иже внутрь души человеческой должно утвердиться, неразумяющим ясно изъяснил еси, стрелами глагол твоих поражая ленивыя и теплохладныя;

воздвигни и ны подвизатися во брани невидимой.

Слава и ныне, Богородичен:

Настави ны на путь покаяния, уклоняющияся присно к злым беспутием, и преблагаго прогневающая Господа, неискусобрачная Благословенная Марие, прибежище отчаянных человеков, Божие обителище.

Прокимен: Честна пред Господем/ смерть преподобных его.

Стих: Что воздам Господеви о всех, яже воздаде ми.

Евангелие: от Матфея. зач. 43

По 50 псалме стихира, глас 6:

Преподобне отче,/ во всю землю изыде вещание исправлений твоих:/ темже на небесех обрел еси мзду трудов твоих,/ демонская разорил еси полчища,/ и ангельския достигл еси чины,/ ихже житию непорочно поревновал еси./ Дерзновение имея ко Христу Богу,/ мир испроси душам нашим.

Канон, глас 8.

Песнь 1

*Ирмос: Воду прошед яко сушу,/ и египетскаго
зла избежав,/ израильтянин вопияше:/
Избавителю и Богу нашему поим.
Вразуми мя от Божественнаго свыше
промышления воспети тя достойно, преподобне
отче Варсонофие, исповедниче.
Приклоншеся Христовым Божественным
законом, сладостей стремления от млада
отвратившеся, всякую добродетель
всеблагоговейно, яко едину, исправил еси.
Всем сердцем притекл еси Христу, изначала
спасительный узкий путь избравше, и
пустынных отец житию поревновавше, чисте
совершающе Единого Учителя Божественныя
заповеди.*

*Богородичен: Светлый Тя и святой храм
Владыки всех, Богоотроковице, с лики
безплотных воспеваю радостно, без исления
Бога Слово Рождшую.*

Песнь 3

*Ирмос: Ты еси утверждение притекающих к
Тебе, Господи,/ Ты еси свет омраченных,/ и
поет Тя дух мой.*

Сияние святости преподобных отец, яко свет фаворский пронзи сердце твое огнем Божественным, егоже потщався не угасити, но на свещнице возвыси, даже и дальния страны изгнания свет той достигл еси. Вслед Христа последовал еси радуящися, носящи крест свой на раме, исповедниче прехвальне; мучителей бо не убоявся, силою Креста укрепляемь. Землю Херсонскую яко апостольский жребий приемши, Христа проповеданием, неустанною молитвою и подвиги исповедническими собор новомучеников и исповедников Русских светолепно украсил еси. Богородичен: Надеждо и Предстательство Тебе поющих, яко Владычица Чистая, Пречистая Богородице Дево, едина Всепетая, моли во еже спастися нам.

Седален, глас 8:

Молитвами твоими, отче преподобноисповедниче Варсонофие, возстави ум и волю, помраченнии страстьми, да в разум приидем и завет со Христом нелицемерным покаянием обновим.

Богородичен:

Непостижимаго Бога, Сына и Слово, несказанно паче ума Рождшая, моли, Заступнице наша, Богородице, согрешений дати нам прежде конца прощение и Царствия Небеснаго достигнути.

Песнь 4

Ирмос: Услышах, Господи,/ смотрения Твоего таинство,/ разумех дела Твоя,/ и прославих Твое Божество.

Яко соние, яко цвет, время жития течет, что всуе мятемся? - вопрошаеши отче, ко обновлению души силою покаяния призывающе.

Востаните, трезвитесь, близ при дверех Судия есть, - взывал еси, старче богомудрый, ко отвращающимся от благочестия, - да не изыдите осуждени в муку вечную.

Последующе наставлению твоему, отче, смирением потщимся изменить душу, - истинное бо смирение сетей свободно лукаваго.

Богородичен: Ни слово, ни разум, ни мудрость человеческая не возмогут Твое рождество разумети, Непорочная, но спасаемии Тобою радостно вопием: слава Воплощшемуся от Тебе.

Песнь 5

Ирмос: Утренююще вопием Ти/, Господи, спаси ны:/ Ты бо еси Бог наш,/ разве Тебе иного не веemy.

Рассеянного жития моего губительное течение исправи, отче богомудре Варсонофие, покаяния бо и трезвения ты еси таинник и делатель на ниве Христове преизрядный. Имея тя помощника, отче, неленно потрудимся, братие, приуготовим ся вечности, законы Царствия Небеснаго: Богообщения, любви и чистоты - молитвою, незлобием и целомудрием, в сердце утвердим. Преподобне Варсонофие, отеческая похвало, не престай моляся, предстоя Троице Пребожественней, даровати разум, и силу зрети, и побеждати страсти душевныя, предстателя тя божественнаго призывающим. Богородичен: Неизмерна глубина любве и милосердия Твоего, Мати Божия и человеческого рода Заступнице верная, не остави до конца в бездне прельщений погибающих, ко пристанищу спасительному таинств церковных направи.

Песнь 6

Ирмос: Молитву пролию ко Господу,/ и Тому возведу печали моя,/ яко зол душа моя

исполнися,/ и живот мой аду приближися,/ и
молюся, яко Иона:/ от тли, Боже, возведи мя.
Содержим аз есмь бурею и треволнением
согрешений, но сам мя, наставниче, якоже и
паству твою в бедственныхя времена упасл еси,
силою молитв твоих ко пристанищу
Божественнаго покаяния возведи.
Обратися, покайся, открьй сокровенная,
глаголи Богу, вся ведущему, тайная твоя, да
подаст ти силу победити плотския страсти, -
тако заповеда творити старец богомудрый.
Егоже возлюбил еси, Егоже возжелел еси, Егоже
ради гонения претерпел еси, исповедниче отче
Варсонофие, моли ныне Христа от незаходимых
глубин греха и отчаяния нас избавити.
Богородичен: Пречистая Владычице,
Богородительнице, Надеждо к Тебе
притекающих и Пристанище сущих в бури,
Милостиваго Создателя и Сына Твоего
умилостиви молитвами Твоими.

Икос:

Возлюбив, преподобне, Христовы Божественныя
заповеди, и возненавидев мира сего
наслаждение, пришел еси усердно к Тому, и был
еси светильник, просвещающа концы блистанием
духовным; тем, припадая, молим тя: просвети
наши очи душевныя, воспети твоя подвиги,

пощение, и бдение, и слезы, болезни и измождение тела, блаженныя ради будущия жизни, еяже ныне наслаждаешься, преподобне отче наш Варсонофие.

Ин кондак, глас 8:

Огнь святости отцев преподобных преобрази душу твою,/ образ жизни духовныя от них восприял еси,/ и потрудился еси, возводя вся к Божественней высоте./ Яко злато в горниле страданий очищен,/ земли Херсонския украшение явился еси;/ темже молим тя:/ молитвами твоими от всяких ны бед спасай, да зовем ти:/ радуйся, преподобне отче Варсонофие богомудре.

Песнь 7

Ирмос: От Иудеи дошедше отроцы/, в Вавилоне иногда,/ верую Троическою пламень пещный попраша, поюще:/ отцев Боже, благословен еси.

Яко дерзновение имый ко Господу, исповедниче и преподобне, разрешение от уз лицемерия, тщеславия, самомнения помози обрести молитвами твоими, да сокрушенным сердцем воспоем: благословен еси, Господи, Боже отец наших.

Яже в мире мужественно поправше временная вся, бодрствовал еси в молитве, богоносне отче,

ныне же ликуеши с воинствы Ангельскими, воспевающе: благословен еси, Господи, Боже отец наших. Добродетельною твоею силою, верою крепкою, терпением многим, светоносне отче, приятелище был еси Святаго Духа, вопиюще сице: благословен еси, Господи, Боже отец наших. Богородичен: Яко роса найде на Тя Дух Свят, и не опали чрева Твоего, Пречистая, огонь Божества, и роди Сына - всех Бога, Емуже поем: благословен еси, Господи, Боже отец наших.

Песнь 8

Ирмос: Богоглаголивии отроцы в пеци,/ со огнем пламень попирающе пояху:/ благословите дела Господня Господа.

Сиянием добродетелей озаривше ум, Варсонофие славне, благоугодну жертву Богу - словесное служение принеся еси, благодарно поя: благословите вся дела Господня Господа. Скорбною и тесною шествовав стезею, Небесныя достиг еси жизни нескончаемья, идеже Свет безконечный есть Христос, со Ангелы поеши: благословите вся дела Господня Господа. Буди, отче честный, заступник непобедим, избави от отчаяния и малодушия, укрепи в преданности воле Божией мольбами твоими ко Господу, поющих: благословите вся дела

Богородичен: Радуйся, Богоприятная утробо, радуйся, Престоле Господень, радуйся, Мати жизни наша, Тя непрестанно величаем.

Светилен:

Благодатию, дарованною тебе, многия ко Христу привел еси, новомучеников всесветлому лику ревнующи, Христов избраниче Варсонофие, землю Херсонскую Божественным словом возделавше, семена веры насадив, приносиши плоды Ему и до ныне. Богородичен: Радуйся, Престоле огнезрачный, радуйся, светильниче свещеносный, радуйся, горо освященная, ковчеже Жизни, Святая Святых превысшая.

На хвалитех, глас 5:

Во всяком обстоянии, болезни и печали/ предавати себе в руке Господни заповедал еси,/ и призывати Заступницу усердную со угодники Божии;/ ныне же ты прославляюще в лице святых,/ отче преподобне Варсонофие, молим:/ простри руку помощи всем просящим ю. Укрепляйте души ваша,/ за скорби благодаряще Златоустаго гласом,/ - и действительно познаете силу в немощи совершающуюся,/ - глаголы сими и молитвою твоею крепкою/ изнемогающих в

терпении возставляя еси,/ любовь движимь,
старче.

Неизбежный путь скорбей пройдем с верою
несумненною/ и преданностию Спасителю
нашему,/ молитвенника тя имея, светоносне
отче, Варсонофие, исповедниче,/ ведуще, яко
претерпевши Голгофу,/ достигнем и светлыя
некончаемыя радости Воскресения.

Слава: глас 8:

Приидите вси вернии,/ восхвалим единого от
собора новоисповедников Русския земли, /
сквозе огонь гонений пронесшаго любовь
Христову,/ силою духа превозмогшаго немощи
плоти,/ пастыря мудраго и старца
прозорливаго,/ проповедника, молитвенника и
чудотворца,/ благодаряще Всесильнаго Бога,/
даровавшаго нам, якоже и в древняя времена,/
сего несокрушимаго ревнителя Православия,/
надежнаго защитника, и крепкаго предстателя,
и помощника: / святаго Варсонофия
преподобноисповедника.

И ныне, глас тойже:

Владычице, прими молитвы раб Твоих,/ и
избави нас/ от всякия нужды и печали.

НА ЛИТУРГИИ

Прокимен: Восхвалятся преподобнии во славе / и
возрадуются на ложах своих.

Стих: Воспойте Господеви песнь нову, хваление
Его в церкви преподобных.

Аллилуиа, гл.6: Блажен муж бояйся Господа, в
заповедех Его восхощет зело.

Стих: Сильно на земли будет семя его.

Апостол: Еф. зач.233

Евангелие: Лк. зач.64

Причастен:

Радуйтесь, праведнии, о Господе, / правым
подобает похвала. / Аллилуиа.

